



Stručna služba općinskog vijeća i općinskog načelnika

Broj: 01/1-02-1041/20

PRIJEDLOG

Ilijaš, 28.05.2020. godine

Z A P I S N I K

sa 42. (četrdesetdruge) sjednice Općinskog vijeća Ilijaš, održane dana 28.05.2020. godine, sa početkom u 10:00h.

Četrdesetdrugom sjednicom Općinskog vijeća Ilijaš predsjedavala je predsjedavajuća Općinskog vijeća Ilijaš g-đa Alma Omerović.

Prisutni vijećnici:

RB.	IME I PREZIME
	SDA
1	ŠEHERZADA ĆOSIĆ
2	ANEL BUMBULOVIĆ
3	-
4	ALMA OMEROVIĆ
5	MEHMED SINANOVIĆ
6	ADEM ALIĆ
7	FAHIR HASANOVIĆ
8	MIRZA BEKTIĆ
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
14	SEAD ŠEHIĆ
	SDP
15	ALAN ŠERAK
16	ELDAR ŠEHIĆ
17	MIRSAD OSMANOVIĆ
	SBB-FAHRUDIN RADONČIĆ
18	AKIF BEŠLIJA
	GS
19	EDHEM HASANOVIĆ
	SAMOSTALNI VIJEĆNICI
20	-
21	ASIM MUJIĆ
22	MUHAMED HANDŽIĆ
23	ALMIR ŠPIODIĆ
24	MEHO DŽINDO
25	-

Odsutni vijećnici:

1. Vehid Halilović,
2. Semir Dizdarević i
3. Besim Gljiva

Prisutni gosti:

1. Radio Ilijaš – Aida Muratović
2. Namka Šuvalija – predstavnica KJP "Sarajevo-šume" d.o.o. Sarajevo
3. Denis Kahrman – predstavnik Uprave za šumarstvo
4. Enisa Kovačević, šefica Službe socijalne zaštite općine Ilijaš– JU Kantonalni Centar za socijalni rad

Ostali prisutni:

1. Meliha Avdibegović – pomoćnik načelnika
2. Merima Osmanović – pomoćnik načelnika
3. Ilda Kahrman – sekretar OV-a Ilijaš
4. Mersa Zeković – šef Odsjeka za prostorno planiranje i zaštitu okoliša
5. Hamida Muratović – šef Odsjeka za imovinsko-pravne poslove
6. Aida Čutura – Marić, stručni savjetnik za poslove Općinskog vijeća i općinskog načelnika
7. Dženan Suša – IT administrator
8. Admir Dervišević, zapisničar

ALMA OMEROVIĆ – predsjedavajuća

Prije nego što počnemo sa radom, vidjeli ste da na vašim stolovima imate maske i maramice, koje smo dobili iz Udruženja porodica nestalih općine Ilijaš, s obzirom da je još uvijek situacija sa pandemijom Corona virus, kakva jeste, te 9. juni se neće moći obilježiti na način kako je to bilo ranijih godina i evo apel iz Udruženja, kao i u moje lično ime da iskoristite te maske i da taj dan zaista na terenu budete sa tim maskama, kako bi se poslala poruka na ovakav način, jer nemamo druge mogućnosti za taj dan.

Predsjedavajuća OV-a Ilijaš je konstatovala da su prisutna 22 vijećnika, da postoji kvorum za odlučivanje, te je otvorila 42. sjednicu OV- a Ilijaš.

Zapisnik sa 41. sjednice OV-a dala je na razmatranje.

Primjedbi na Zapisnik nije bilo, pa je OV-e jednoglasno usvojilo Zapisnik sa 41. sjednice OV-a.

Pročitala je predloženi dnevni red za 42. sjednicu OV-a Ilijaš, te isti dala na razmatranje.

Primjedbi i prijedloga na predloženi dnevni red nije bilo, pa je OV-e jednoglasno usvojilo slijedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 41. sjednice
3. Informacija o izvršenju Budžeta općine Ilijaš za period 01.01.-31.03.2020. godine

4. Informacija iz oblasti šumarstva
5. Informacija o ostvarivanju socijalne zaštite na području općine Ilijaš za 2019. godinu
6. Prijedlog Odluke o davanju saglasnosti na plan utroška namjenskih sredstava prikupljenih po osnovu naknade za korištenje državnih šuma
7. Nacrt Odluka o:
 - a) usvajanju Regulacionog plana "Lješevo-Željeznička stanica"
 - b) provođenju Regulacionog plana "Lješevo-Željeznička stanica"
8. Prijedlog Programa uređenja građevinskog zemljišta za dio lokaliteta Banovac
9. Prijedlog Odluke o neposrednoj pogodbi za prodaju neizgrađenog građevinskog zemljišta k.č.br. 713/5

AD-1

Vijećnička pitanja i inicijative

ALMIR ŠPIODIĆ - samostalni vijećnik

Obzirom da imamo Zaključak sa 40. sjednice Općinskog vijeća da vijećnička pitanja i inicijative dostavljamo u pismenoj formi, ja sam danas imao par pitanja koje sam želio postaviti načelniku i da mi odmah odgovori. S obzirom da ga nema prisutnog ovdje, ja ću to predati. Mislim da bi u narednom periodu, taj Zaključak što smo donijeli, trebali bi promijeniti, s obzirom da je se i situacija promjenila. Mislim za narednu sjednicu da bi trebali taj Zaključak promijeniti, odnosno da se povuče, da se vrati onako, kako smo radili i do sada po Poslovniku i Pravilniku.

ALMA OMEROVIĆ – predsjedavajuća

Načelnik iz opravdanih razloga danas nije tu, javio se da neće biti tu, obzirom da je u Sarajevu na potpisivanju važnog Sporazuma.

Kolege su već predale u pismenoj formi. Ja da budem iskrena, zaboravila sam za taj Zaključak, hvala kolegi što me je podsjetio. Također, zahvaljujem se i kolegama koji su već predali vijećnička pitanja i inicijative u pismenoj formi.

MIRZA BEKTIĆ – vijećnik SDA

Inicijativa:

Pokrećem inicijativu prema Službi za saobraćaj, stambeno-komunalne poslove i građenje da izvrši iskop postojećeg šahta duž lokalnog puta prema Gljivama, kod malog propusta u Kadarićima i omogući površinskoj vodi prolaz ispod puta, a ne da se ista razlijeva po putu.

Obrazloženje:

Prilikom iskopa kanala duž lokalnog puta prema Gljivama, kod malog propusta u Kadarićima zatvoren je kanalizacioni i oborinski šaht u koji se ulijeva površinska voda sa padinskog dijela ovog naselja. Voda iz šahta je ispod lokalnog puta dolazila u kanal u malom prostoru.

MIRSAD OSMANOVIĆ – vijećnik SDP

Pitanje:

Kada je planirano nasipanje, odnosno asfaltiranje dijela ulice /socijalno-barake/, Ivana Franje Jukića?

AKIF BEŠLIJA – vijećnik SBB

Inicijativa:

Pokrećem inicijativu prema nadležnoj općinskoj Službi i komunalnom inspektoru da izađu na teren i utvrde činjenično stanje u ulici Vratuša bb, kuća Alić Alena, te nalože čišćenje septičke jame.

Obrazloženje:

Radi se o tome da fekalije iz septičke jame pomenutog vlasnika teku po putnom pravcu Mrakovo – Vratuša.

Molim Vas da me pismeno izvjestite o poduzetim aktivnostima.

HALID DIZDAREVIĆ – vijećnik SDA

Inicijativa:

Pokrećem inicijativu prema nadležnoj općinskoj Službi da mi dostave Informaciju koliko i koji vijećnici iz Općinskog vijeća Ilijaš, koriste pravo na uplatu penzionog-zdravstvenog osiguranja?

Također, da mi se dostavi tabelarni prikaz po imenu i prezimenu vijećnika i sa iznosima koji su uplaćeni za mandatni period 2016-2020. godina?

ADEM ALIĆ - vijećnik SDA

Inicijativa:

Podnosim inicijativu prema nadležnoj općinskoj Službi da se poduzmu aktivnosti u pogledu uređenja (osvjetljenja) školskog dvorišta kod Osnovne škole "Hašim Spahić" Ilijaš.

Obrazloženje:

S obzirom da je školsko dvorište kod Osnovne škole "Hašim Spahić" Ilijaš neosvjetljeno, a u večernjim satima na tom mjestu se često pojavljuju "sumnjiva" lica koja konzumiraju razna nedozvoljena sredstva. Da bi se poboljšala sigurnost učenika škole, samog školskog objekta, ali i građana MZ-e Ilijaš Grad, uređenjem i osvjetljenjem školskog dvorišta kod Osnovne škole "Hašim Spahić" Ilijaš, trajno bi se riješio navedeni problem. Na zemljanoj površini koja se nalazi iznad školskog igrališta, nalaze se četiri bandere koje su prije osvjetljivale nekadašnji teren sa umjetnom travom, kojom je upravljala Sportska akademija Ilijaš, te bi one mogle biti od pomoći prilikom iznalaženja rješenja za osvjetljavanje školskog igrališta.

Pitanja:

1. Kada će biti realizirana sredstva za podsticaj poljoprivrednoj sjetvi registrovanim poljoprivrednim proizvođačima, koja ste obećali preko Federalnog ministarstva za poljoprivredu?
2. Zašto ste preko Savjeta mjesnih zajednica tražili da naprave spiskove zainteresiranih građana za proljetnu sjetvu u smislu podjele sjemena, a onda tražili da naprave spiskove samo ljudi koji imaju registrovana gazdinstva, jer kao takvi mogu ostvariti pravo za dobivanje sjemena?

Na ovaj način ste pokazali da organ uprave ne funkcioniše kako bi trebao. Jednostavno ste mogli u nadležnoj općinskoj Službi doći do spiska poljoprivrednika koji imaju registrirana gazdinstva, kontaktirati ih telefonom i informisati o podsticaju, tim činom ne dovoditi predsjednike Savjeta MZ u nezgodnu situaciju. Veliki broj građana javio se za ovu vrstu pomoći, vi ste promijenili Javni poziv, gdje ste naveli da moraju biti upisani u registar poljoprivrednih gazdinstva.

3. Zašto Općina Ilijaš nije izradila plan pomoći ljudima koji su bili zainteresovani za proljetnu sjetvu a nemaju registrirano poljoprivredno gazdinstvo?

Ovom stavkom obuhvaćam ljude koji su ostali bez posla u proteklom periodu a imaju obradivu zemlju koju do sada nisu obrađivali, zato što su bili zaposleni. Poznato je da su dvije firme Standard i Kalea koje su zapošljavale najviše radnika u Ilijašu bile primorane otpustiti radnike, kao i mnoge druge firme, poslati ih kućama i na biro. Ljudima koji su ostali bez posla a imaju zemlje za sjetvu trebalo je pomoći na vrijeme da je obrade i zasiju, na način kako je to uradila Općina Visoko. U saradnji sa povjerenicima svih 26 gradskih i vangradskih mjesnih zajednica, obezbijedili su sjemena za 580 domaćinstava. Prilikom podnošenja zahtjeva prioritet su imala lica/domaćinstva sa jednim ili više nezaposlenih osoba i penzioneri. Ili kao što je uradila Općina Vogošća koja je umjesto 20 plastenika, podijelila 40, prioritet su imale porodice slabog socioekonomskog statusa.

Iz odgovora na vijećničku inicijativu kolege Dedića, zaključio sam da Općina Ilijaš ove godine ne planira podjelu plastenika ako se ne javi neki donator koji bih to finansirao. Mislim da bi inicijativu kolege Dedića, Vijeće trebalo usvojiti kao Zaključak. Da općina kroz rebalans Budžeta obezbijedi sredstva za sufinansiranje nabavke plastenika površine 50 i 100 m² za minimalno 20 porodica slabog socioekonomskog statusa.

Inicijative:

1. Pokrećem inicijativu da se uklone grane drveća koje su izrasle na trotoaru iz privatnog posjeda na potezu od zgrade elektrodistribucije do pružnog prelaza Alića rampa.

Obrazloženje:

Grane drveća koje su izrasle na trotoar sprečavaju kretanje pješaka na pomenutoj lokaciji. Predlažem da općinski komunalni inspektor izađe na teren i iznađe način uklanjanja prepreke za nesmetano kretanje pješaka trotoarom.

2. Pokrećem inicijativu da se prostor u kojem se skladišti izborni materijal prije i poslije izbora postavi video nadzor, također kamerama da se pokrije prostor od ulaza u općinu do ulaza u prostorije gdje se nalazi izborni materijal, radi obezbjeđenja transparentnosti provođenja samih izbora, kao i poštovanja zakonskih propisa, a u cilju sprječavanja mnogobrojnih zloupotreba i nepravilnosti u toku samog izbornog procesa, kojim se nažalost svjedoči u mnogim prošlim izborima.

SEAD ŠEHIĆ – vijećnik SDA

Inicijativa:

Obraćam se nadležnoj općinskoj Službi a u vezi sljedećeg pitanja, da se natkriveni otvoreni dio pijace ogradi određenim panelima.

Obrazloženje:

Na zahtjev naših samostalnih poljoprivrednih proizvođača, koji svoju robu prodaju na natkrivenom, ali otvorenom dijelu pijace, imam zamolbu da se navedeni prostor sa tri strane zatvori. Naime, ovim bi se rad navedenih lica itekako olakšao, jer su izloženi uticaju nepovoljnih vremenskih prilika. Pogotovo je to izraženo za vrijeme perioda jesen, zima, a sve zbog nanosa kiše, vjetra i stvaranja velikog propuha i promahe što im onemogućava normalan rad i šteti njihovom zdravlju.

Zato vas molim da ovoj inicijativi izađete u susret, jer ne zahtijeva velika sredstva. Unaprijed zahvaljujem.

AD-2

Izveštaj o realizaciji zaključaka sa 41. sjednice

ALMA OMEROVIĆ - predsjedavajuća

Na 41. sjednici OV-a Ilijaš, nije bilo Zaključaka.

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Izveštaj o realizaciji zaključaka sa 41. sjednice

AD-3

³Informacija o izvršenju Budžeta općine Ilijaš za period 01.01. - 31.03.2020. godine

Diskutanata po ovoj tački dnevnog reda nije bilo, pa je Općinsko vijeće primilo k znanju Informaciju o izvršenju Budžeta općine Ilijaš za period 01.01. - 31.03.2020. godine

AD-4

Informacija iz oblasti šumarstva

DENIS KAHRIMAN – predstavnik Uprave za šumarstvo

Uprava za šumarstvo u sklopu Ministarstva privrede radi niz poslova, a jedan od ključnih i najvažnijih poslova je zaštita državnih šuma i šumskih zemljišta od bespravne sječe i svih drugih uzurpacija vezanih za bespravnu sječu. Što se tiče prošle godine odnosno 2019. godine na području općine Ilijaš, Uprava za šumarstvo je podnijela 121

prekršajnu krivičnu prijavu, od toga su 2 krivične i 119 prekršajnih prijava. Što se tiče bespravnih siječa, ukupan obim evidentiran u toku 2019. godine je cca 2350 m³, oko 870 m³ su u državnim šumama, a 1470 m³ je u privatnim šumama. Što se tiče problematike, znači mi smo u mjesecu martu ove godine, uputili jedan dopis na Kolegij OV-a Ilijaš, tražili smo jednu vrstu pomoći od Općine Ilijaš i OV-a Ilijaš, naime radi se o višestrukim povratnicima u činjenju prekršajnih djela, kao što su bespravna sječa šuma i bespravan promet drvne mase. Ta lica stanuju na području općine Ilijaš, vrše bespravnu sječu i promet, posjeduju neregistrovana motorna vozila. Obično su to lica koja nemaju stalno zaposlenje, dolaskom, odnosno predajom na sud, prilikom izricanja sudskih presuda, te su presude vrlo stimulativne za njih i za njihov taj daljni rad. Iz tog razloga mi smo uputili dopis, tražeći od OV-a, jednu vrstu pomoći, odnosno da probamo uključiti sve relevantne institucije u ovu problematiku, jer Uprava za šumarstvo ne može sama iznaći adekvatno rješenje da bi se te bespravne sječe promet drvne mase suzbio ili bar na neki način smanjio.

NAMKA ŠUVALIJA – predstavnik KJP "Sarajevo-šume" d.o.o. Sarajevo

Dolazim ispred "Sarajevo-šume" d.o.o. Sarajevo, rukovodilac sam plana i analize, što se tiče podataka koje sam ja dostavila u pisanoj formi, samim tim smatram da nema potrebe da sad iznosim šta smo realizovali i šta je bilo. Uglavnom ja bi se bazirala na Vaša pitanja, na ono što Vas interesuje da pitate i ja ono što mogu da Vam odgovorim. Kada je u pitanju Općina Ilijaš, ovdje želim istaći da imamo korektnu saradnju, što se tiče nekih zajedničkih projekata, mi smo zadovoljni tom saradnjom. Također, kada je u pitanju plaćanje naknade za državne šume, ovdje želim naglasiti, da smo mi u protekloj godini uplatili 373.000 KM za naknadu, to je znači bio dug iz prethodnih godina. Kada je u pitanju 2019. godina, ostao je dug i bio je potpisan Ugovor sa Općinom Ilijaš, gdje smo mi trebali u jednakim ratama da platimo po cca 29.000 KM. Znači mi smo prve dvije rate isplatili, treću i četvrtu, nismo zbog ove situacije koja je nastala, čim budemo u mogućnosti mi ćemo te svoje obaveze ispuniti, spremni smo na saradnju, da potpišemo eventualno novi ugovor i da svoje obaveze ispunimo.

RASIM ŠEHIĆ – vijećnik SDA

Na tragu ove Informacije, kako sam shvatio da u 2019. godini, naknada za šume, odnosno Ugovor se ne poštuje, evo kako imamo Informaciju da se izmirio dug iz prethodnih godina, a da za 2019. godinu nije ništa uplaćeno, to je onako kako sam ja shvatio. Druga stvar, isto imam informaciju, osim što se ne uplaćuju naknade za šume na području općine Ilijaš, imam isto tako jednu nedoumicu i informaciju da se također, ne ulaže ništa po pitanju sadnica, iako smo imali u ovom periodu izuzetno povoljno vrijeme za ovo, kada je u pitanju ovaj vremenski period do kraja maja. Evo obzirom da dolazite iz tog Sektora za plan i analizu, vjerovatno posjedujete informaciju, interesuje me za same uposlenike, koji dolaze sa područja općine Ilijaš, interesuje nas da li je bilo otpuštanja radnika sa područja općine Ilijaš? I interesuje me sa te statističke strane, je li to srazmjerno u odnosu na druge općine, obzirom na samu sječu i finansijske pokazatelje, koliko prihoda ostvarujete sa područja općine Ilijaš?

ALMIR ŠPIODIĆ –samostalni vijećnik

Ja sam prije par mjeseci pokretao jednu inicijativu, prema Sarajevo-šumama, koja se tiče naselja Sudići. U pitanju je da se odobri raskres puta kroz Sudiće, kako bi mogao prolaziti

autobus Centrotransa i povezati Sudiće i Dragorade, da ne izlaze ljudi po km do ceste. To je u pitanju par stabala. Ja sam tada to uslikao, pokrenuo inicijativu, na koju nikada nisam dobio odgovor od Sarajevo-šuma. Znači u pitanju je par stabala, koja su u putnom pojasu i trebalo bi ih ukloniti, kako bi autobus mogao nesmetano prolaziti. Drugo, kao što gospodin reče da Sarajevo-šumama najveći problem predstavljaju ljudi koji su na birou i nemaju od čega da žive, bave se krađom, kako vi nazivate šume. Da su oni jedini problem, mislim da bi Sarajevo-šume puno više i puno bolje, odnosno pozitivnije poslovale i rješavale bi se neke stvari. Da se rješavaju neke stvari, kao što se rješava to, sa ovim ljudima, što tražite od nas da se uključimo, da mi spriječimo krađu šume. Ljudi moji da su problem samo ti nekoliko ljudi, koliko ih već ima sa područja općine Ilijaš, što krađu šumu, Sarajevo-šume bi bila najuspješnija firma u Kantona Sarajevo. Imate li Vi nekih drugih problema, osim tih demobilisanih boraca, nezaposlenih ljudi koji krađu šume? Oni se sankcionišu, svjedoci smo da njih Sud osudi. Ima takvih iz čitave BiH. Vi nesankcionišete one ljude koji Vam prave veću štetu, a vi znate oni su među Vašim redovima, nisu oni na terenu, oni su u kancelarijama.

SEMIR DEDIĆ – vijećnik SDA

Samo ću kratko nadovezati se na ovo Rasimovo pitanje i diskusiju, pošto sam bio i sam uposlenik Sarajevo -šuma. Rasime što se tiče ovoga, kao što ti kažeš shvatio si da nisu dvije rate plaćene, pazi situacija je bila takva, da su napravljeni dugovi od strane Sarajevo-šuma prema Općini Ilijaš, tj. nisu plaćene naknade za korištenje šuma, ali to je period 2010., 2011., 2012., 2013. godina i onda je napravljen taj Sporazum da bi se parcijalno mjesečno isplaćivalo u ratama u iznosu koji je ovdje naveden, kako bi se sve to sustiglo. Ta dinamika ide svojim tokom, tako da ove dvije rate koje nisu plaćene, to nije ništa strašno, to će se isplatiti, obzirom da je i ova situacija vanredna, tako da to neće biti problem. Za sadnice, mogu ti kazati, da svake godine provede se javna nabavka za sadni materijal. Nikada nije bilo ispod 180.000 KM, tako da se na tome intenzivno radi, uz to stalno i projekti i na dobrovoljnoj osnovi se radi. Razna Udruženja vrše pošumljavanja, postoje akcije uposlenika, gdje su oni obavezni određeni broj dana ići i sam sam bio na pošumljavanju. Samo mene zanima, prošle godine od OKFŠ-a, mi smo imali nešto manji iznos cca 200.000,00 KM? Znamo mi što je to tako bilo. Zanima me jesu li projekti predani prema Ministarstvu ove godine? Zanima me otprilike u parama iznos projekata, prema Općini Ilijaš? Tipa je li to 100.000,00 KM; 200.000,00 KM; 500.000,00 KM ili 1.000.000,00 KM, vrijednost projekta, ako imate informaciju? Ako nemate, biće druga prilika.

MUHAMED HANDŽIĆ – samostalni vijećnik

Imam jedno pitanje za gospođicu ili gospođu koja dolazi ispred Sarajevo-šuma, Sektor plan i analize, a ono se odnosi na zaštitu šumskih područja u smislu izgradnje protivpožarnih puteva. Svjedoci smo, da postojeći putevi, koji se već nalaze u prostorima, kojim gazduju Sarajevo-šume su i zarasli, a neki i prokopani od strane korisnika Sarajevo-šuma. Dakle, nama se svake godine desi požar na općini Ilijaš, jedan, dva ili deset požara, vatrogasne jedinice nisu u mogućnosti da pristupe gašenju tih požara, nego na najprimitivniji mogući način izvršavaju svoj zadatak, noseći takozvane žabe na leđima sa desetak litara vode i da tako gase požar, koji je zahvatio cca 10 ili 20 hektara šume. Dakle, ako niste planirali, onda ćete vjerovatno morati planirati da radite pojase za zaštitu šuma u smislu da se otvore putevi, da se skloni šibljje, otpad sa prostora gdje može doći do požara. Ovdje mi pričamo o finansijama, kako Vi nama dugujete, odnosno Općini Ilijaš i

Vi ćete to vjerovatno dati, na način na koji se to reguliše, ali ovo je vrlo bitno pitanje koje sam htio postaviti Vama i da čujem odgovor. Ne želim odgovor, mi smo to planirali nekada, u smislu neki dugoročni plan. Da vidimo je li to Vama prioritet ili nije? Je li Vi štitite šume od šumokradica u smislu da prokopavate puteve i da pošaljete Vaše čuvare, odnosno šumare na teren. Vjerujte da ćete na taj način, najmanju korist imati, što će oni uhvatiti nekoga što krade šumu, ali ovo ako izgubimo hektare i hektare šume u toku požara, e to je šteta i u tom smislu bi bilo dobro da poradite na zaštiti šuma.

FAHIR HASANOVIĆ – vijećnik SDA

Imam jedno pitanje za goste, u zadnje vrijeme imamo dosta priče, kako imamo šumu, a u stvari nemamo tehničkog drveta, pa bi želio da nam pojasne kako je stanje na terenu za tehničko drvo, odnosno koliko je prirast u odnosu na ono što se izvozi? Da li se pokriva izvoz sa prirastom?

HALID DIZDAREVIĆ – vijećnik SDA

Konkretno me zanima, koliko je u 2019. godini uloženo u šumsko uzgojne radove u obnovu šuma? Koja je zakonska obaveza za ovu godinu da se to uradi? Obzirom da smo imali proljetni period u kojem je otprilike trebalo da bude zasađeno, odnosno trebalo je da bude urađena većina posla, jer ne možemo u toku čitave godine vršiti sadnju, odnosno možemo, ali trebamo iskoristiti povoljne proljetne uslove, kao i jesenje koje nam ako Bog da dolaze. Bez obzira na sve javne nabavke, tendere i sve ostalo, svaka firma, odnosno preduzeće koje zna da ih to očekuje, treba da se pripreme. Ja imam informacije da je jako malo toga zasađeno i zašto je to tako? Interesuje me, ne mogu da shvatim i ne želim da nađem opravdanje da se ne obnavlja šuma, fali nam tehničko drvo. Kakav je plan, prirast, zašto nema takve vrste poslova?

NAMKA ŠUVALIJA – predstavnik KJP "Sarajevo-šume" d.o.o. Sarajevo

Kad su u pitanju sva postavljena pitanja, neko je spomenuo put Sudići, zašto nikada nisu dobili odgovor, ja zaista smatram da mi imamo korektnu saradnju i da je trebalo možda nazvati izvršnog direktora ili nekog direktora šumske Uprave i to kontaktirati, pa da se to proba završiti. Ja ne vidim razloga, što to do sada nije završeno. Možete kontaktirati, u svako doba se obratiti, ako mi možemo nešto pomoći ili uraditi, mi smo spremni uvijek na saradnju. Pozivam Vas da se još jednom obratite, vezano za to, što nije do sada riješeno, pa da se i to riješi. Kada je u pitanju naknada, pitali ste da li je išta uplaćeno? Ove godine je uplaćena prva i druga rata, odnosno 58.000,00 KM i kao što je kolega rekao, mi ćemo taj svoj dug izmiriti. Kada je u pitanju zaštita šuma od požara i izgradnja protivpožarni puteva, znači mi u Sarajevo-šumama imamo Službu koja se bavi protivpožarnom zaštitom i svake godine se planira, odnosno izrade se projekti, koji su bazirani i da se urade ti pojasevi, da bi bio lakši pristup za gašenje požara, jer na kraju i mi učestvujemo u gašenju požara, sa svojim uposlenicima. Kada je u pitanju tehničko drvo, naš godišnji etat nije veći od prirasta i ne smije nikako biti. Mi gospodarimo u skladu sa odrednicama šumsko-privredne osnove, ona je izrađena za 10 godina, nije izrađena sa naše strane, nego je izrađena usvojena u skladu sa odrednicama šumsko-privredne osnove. Ne znam za taj problem kada je u pitanju tehničko drvo, sada jeste problem, da mi tehniku nismo sjekli zbog pandemije Corona virus, jer ona gubi na kvalitetu. Iz tog razloga smo sada prodavali ogrijevno drvo u toku pandemija Corona virus, jer nismo mogli plasirati i gubilo bi na kvalitetu, nije to neki proizvod koji može da stoji bez da gubi na kvaliteti. Što se tiče

pošumljavanja, isto tako, pošumljavanje se obavlja u skladu sa šumsko-privrednom osnovom, tačno je određeno šta se treba pošumiti, gdje smo mi dužni da u toku tog desetogodišnjeg perioda pošumimo, tačno u kojoj vrsti šuma, sve je određeno. U određenom zaostatku jesmo, zato što se radi o visokim šumama i taj zaostatak se odnosi na te šume i smatram da će se to uraditi u periodu dok ne istekne šumsko-privredna osnova.

ALAN ŠERAK – vijećnik SDP

Ako sam dobro shvatio, Vi poštujete Sporazum koji ste potpisali sa Općinom Ilijaš u vezi davanja naknada koji ste Vi obavezni, dinamikom koju ste Vi dogovorili sa lokalnom zajednicom, to ide redovno?

NAMKA ŠUVALIJA – predstavnica KJP "Sarajevo-šume" d.o.o. Sarajevo

Mi smo uplatili dvije rate, ali ovo kako je pandemija Corona virus, uplatili smo za januar i februar, trebali smo za mart i april, s tim da nismo tu martovsku i aprilsku, ali uzimajući u obzir koliko smo bili u dugu, znači mi smo u prošloj godini uplatili više, već za jednu čitavu godinu i mislim da ćemo u ovoj godini, da nije bilo ove nesretne Corone, mi bi vjerovatno za prvo tromjesečje uplatili već i stigli bi ovu dinamiku, ova dinamika od 29.000,00 KM bi išla redovno. Međutim, nije Općina Ilijaš jedina, kojoj mi plaćamo naknade. Tako da bi nas dovelo u velike teškoće, čim bude prilika, mi jedva čekamo da se riješimo tog duga i da platimo.

MUHAMED HANDŽIĆ – samostalni vijećnik

Naravno, da sam dobio odgovor kakav sam i očekivao, s kojim neću biti zadovoljan. Odgovor da se rade protivpožarni putevi, je zaista nekorektan. Nemate protivpožarnih puteva, na sljedećem Vašem Izvještaju, ja obećavam da ću ja donijeti snimak, te zamoliti ove ljude koji rade sa ovim displejom, da puste i da vidite kakvi su Vam protivpožarni putevi. Vi imate puteve samo za eksploataciju šume, tamo ih i asfaltirate ako to treba. Ja sam učestvovao u gašenju požara jedne tu šume i nosao sam onu gumenu žabu na leđima, zato i govorim to. Vaši uposlenici su došli tu da konstatuju stanje, a nisu oni gasili požar. Oni su došli da konstatuju stanje, zajedno sa policijom, a ostavili su protivpožarno vozilo 3 km od žarišta. Iz tog razloga ja govorim, poučen tim iskustvom, praksom da Vi sebi u dogledno vrijeme planirate i zaista uradite protivpožarne puteve i protivpožarne pojase, kako to već u EU na snazi ima već 20 godina, a mi vjerovatno kasnimo 200 godina, pa će to nekada biti kod nas, to će dočekati naša praunučad. Ja nemam ništa zaista ni protiv Sarajevo-šuma, niti lično protiv Vas, ali moram ovo reći da više ne dolazimo u situaciju, da nam se dese štete nesagledivih razmjera, a mi kao da nešto čuvamo.

NAMKA ŠUVALIJA – predstavnica KJP "Sarajevo-šume" d.o.o. Sarajevo

Ja se Vama zahvaljujem na toj sugestiji i ja Vam sa ovog mjesta mogu obećati, da ću prenijeti to Upravi i da ću pokušati da skrenem pažnju na Vaša zapažanja. Možete se i u pisanoj formi obratiti, tako i da napismeno imamo, koji su to eventualno putni pravci. Znači uvijek smo otvoreni za saradnju sa lokalnom zajednicom.

Ja ću dati jedan komentar i imam još jedno pitanje na koje niste odgovorili. Maloprije kada ste uputili na Upravu da se možemo obratiti i da je tu direktor, pa ne samo sad bilo je i ranije tih problema, ali dat ću Vam praktično jedan primjer, obzirom da gravitiram sa tog području i da sam učestvovao aktivno u rješavanju jednog takvog puta, vjerujte da je to toliko iscrpljujuće i naporno i da vas jednostavno ljudi gledaju da vas odbiju. Kada trebaju da dođu da se pravi Plan sječe, sve to je super, izlazio je i načelnik i direktor preduzeća, sve je bajno, krasno, a onda kada treba da se naspe put koji je uništen cca 300-400 m, dolaze razni izgovori, tipa da nema materijala. Jednostavno morate potrošiti toliko energije, da jednostavne kažete nekome, ako nemate materijala kupite. Nemate pristup kamenolomu, ali imate firmu koja se bavi i koja vam može isporučiti za 2.000,00; 3.000,00 ili 5.000,00 KM nije bitno. Znači, jednostavno da sugerišete, da Bogdo mi imamo ovdje mehanizam da opstruišemo neke stavri, govorim generalno, nije u pitanju sada ova situacija, onda bi bila pozicija sigurno bolja. Putevi bi se održavali, sigurno bolje da imamo kakav mehanizam, da mi možemo evo neusvajanjem, ne samo sad, već inače i u prethodnim periodima, da možemo bilo šta opstruisati, sigurno bi bilo puno bolje i sigurno bi se domaćinski odnosilo preduzeće prema svemu tome. Ostali ste mi dužni podatak o otpuštenim radnicima sa područja općine Ilijaš u ovom sada periodu i proporcija u odnosu na druge općine? Da li je to srazmjerno sa rezultatima i sjećom koja se vrši ukupno na Kantonu Sarajevo?

NAMKA ŠUVALIJA – predstavnica KJP "Sarajevo-šume" d.o.o. Sarajevo

Kad su u pitanju radnici, mi imamo jedan broj radnika na neodređeno vrijeme, većinu imamo radnike na određeno radno vrijeme. Kada je u pitanju otpuštanje radnika, odnosno neprodužavanje ugovora, svi proizvodni radnici, koji su kod nas radili, oni su planirani da budu ponovo zaposleni. Međutim, i mi se srećemo sa nekim problemima, gdje nam treba suglasnost Ministarstva privrede Kantona Sarajevo da bi mi zaposlili ljude. Tako da za svakog radnika koji je kod nas radio, on je i u planu, ja Vam mogu to i garantovati, on je u planu kao da je naš radnik. Neko je radi 2,3 godine, tako da je to srazmjerno kako je kome isticao ugovor, dostavljan je dopis Ministarstvu privrede da se ti ljudi ponovo angažuju, tako da nema tu nešto posebno da se vodi računa, s koje općine dolaze, već kako je isticao ugovor, Ministarstvu je dostavljen dopis u kojem se traži da se ponovo ti ljudi na određeno vrijeme prime. Što se tiče puteva, tu smo isto imali problem, gdje smo nabavili mašine i gdje bi mogli jedan dio puteva sa vlastitim sredstvima da završimo, no međutim, imamo pozajmnštva koja su planirana, a da bi mi te puteve doveli u prvobitno stanje, tu smo imali malo problema sa Rudarskom inspekcijom, na kraju mislim da je postignut neki dogovor, bez obzira što je nama to dozvoljeno i možemo da radimo u manjoj količini za vlastite potrebe eksploataciju u određenim odjelima i to je planirano šumsko-privrednom osnovom. Imali smo tih nekih problema i koliko ja imam informaciju ti problemi su riješeni i trebalo bi da se ti poslovi završe, da se putevi dovedu u prvobitno stanje, na dobrobit svih i šume i lokalnog stanovništva.

ALMIR ŠPIODIĆ – samostalni vijećnik

Evo jedna replika, kažete da je bilo otpuštanja radnika i da je većina Vaših radnika na određeno vrijeme, da su neki ljudi radili po 2,3 godine, pa im istekao ugovor i otpustili ste ih. Imam komšiju koji je radio 6 godina na ugovor i dobio je moždani udar, ne da je socijalni slučaj, nego nema od čega da živi, ne može se navesti socijalni slučaj, kakav je

taj čovjek, zato što je 7 godina potkivao konje u Sarajevo-šumama, a nije dobio ugovor na neodređeno vrijeme. Danas nema pravo nikakve benefite da ostvaruje kao radnik, dok je na bolovanju, nema nikakvo primanje. E tako Vi iskorištavate našu radnu snagu iz Ilijaša, koja radi kao fizički radnik u Sarajevo-šumama, dok svi oni ulickani koji rade u kancelarijama su na neodređeno, jer su oni došli po političkoj strani. Ova mašinerija, sitna buranija rade na određeno vrijeme i prvi mjesec kad nemaju posla, bez obzira što su godinama kisli po šumi, nije to nimalo lahak posao, što su vozali traktore, potkivali konje itd, oni su ostali bez posla prvi mjesec kada je malo zaškripalo. Nije mi jasno, kažete Vi koristite naš resurs, resurs naše općine, priroda nam dala šume i kažete teško je, ima još općina kojima duguju, teško je izmiriti nama naše obaveze. Ljudi moji Vi dobivate đaba resurse, Vaše je da ga eksploatišete i prodate, platite čije je šta i gotovo. Vaša administracija je prezatrpna, ne govorim to Vama lično, nego mislim na Sarajevo-šume.

NAMKA ŠUVALIJA – predstavnik KJP "Sarajevo-šume" d.o.o. Sarajevo

Što se tiče radne snage, to nije samo sa područja općine Ilijaš. Inače što ste rekli, jeste kod nas dosta ima invalida rada, ne samo sa područja općine Ilijaš, nego inače, to je problem kako Sarajevo-šuma, tako i drugih šumarstava, imamo 70 invalida rada.

ALAN ŠERAK – vijećnik SDP

Želim samo da pojasnim određenu stvar, da se ne bavimo previše politikanstvom sada ovdje. Da bi Uprava Sarajevo-šuma zaposlila nekoga ili mu produžila ugovor i ostale stvari tu treba saglasnost od strane resornog ministra, ako se radi o vremenu na određeno, a ukoliko treba da ide za stalno, onda odluku treba da donese Vlada Kantona Sarajevo. Svi ljudi što su nedavno ostali bez posla, Uprava se regularno javila novom ministru, da dobije suglasnost da im se produži ugovor. Dakle to je činjenica i to je tako. Radi se o ljudima sa kojima SDP, nema veze, ali mi opet korektni, pa hoćemo te ljude da zadržimo, jer se ne igramo tih stvari da nekome narušavamo egzistenciju. Onda taj novi ministar, ne izda saglasnost, da bi se istima produžio ugovor. Je li ovo tačno što govorim?

NAMKA ŠUVALIJA – predstavnik KJP "Sarajevo-šume" d.o.o. Sarajevo

Pa treći put smo poslali dopis da se prime ljudi koji rade na određeno radno vrijeme.

ALAN ŠERAK – vijećnik SDP

O tome se radi, sadašnji saziv ne dozvoljava da se ljudi ostave na radnim mjestima, odnosno da im se produže ugovori, a da ne govorim da je dobar dio tih ljudi sazio da radi na neodređeno vrijeme, ali za takvo nešto, nažalost treba saglasnost Vlade Kantona Sarajevo i na to Uprava Sarajevo-šuma ne može da utiče.

ALMA OMEROVIĆ – predsjedavajuća

I ja želim da se manimo politikanstva i da priču usmjerimo u neke druge stvari, odnosno priču, zbog čega su ovi ljudi danas ovdje s nama.

MEHMED SINANOVIĆ – vijećnik SDA

Moje pitanje, a možda i konstatacija u svom izlaganju rekli ste da općina Ilijaš, nije jedina općina, kojoj Vi trebate plaćati naknade, ali složiti ćete se sa mnom, ispravite me ukoliko griješim da Općina Ilijaš jedna od vodećih općina na kojoj se vrši eksploatacija Vaših resursa, pa samim tim bi mi trebali da budemo i prioritet, prilikom plaćanja tih obaveza.

NAMKA ŠUVALIJA – predstavnik KJP "Sarajevo-šume" d.o.o. Sarajevo

Pa mogu Vam odgovoriti, da i jeste prioritet, obzirom da je najviše isplaćeno Općini Ilijaš i kažem Vam još jednom da nije bilo pandemije Corona virusa i nažalost da nije bilo ovoga svega, što nas je sviju zadesilo, vjerovatno mi bi već platili ove dvije rate i vjerovatno uplatili i za ovo prvo tromjesečje.

ALAN ŠERAK – vijećnik SDP

Vi ste 2019. godinu ispoštovali i tu ste završili, a za ostalo ćete sljedeće godine dati informaciju.

NAMKA ŠUVALIJA – predstavnik KJP "Sarajevo-šume" d.o.o. Sarajevo

Što ste rekli da su ti ljudi sa područja općine Ilijaš, većinom proizvodna radna snaga ima i drugih ljudi. Evo i kolege će potvrditi nije to samo da se radi o proizvodnoj radnoj snazi iz Ilijaša, znači sa svih područja ima i proizvodne radne snage i ljudi koji rade u kancelarijama, koji su inženjeri šumarstva ili rade neke druge poslove u kancelarijama, ima i sa područja općine Ilijaš, ja lično znam, a ne bi sada prebrojavala, zato što svi imamo pravo na posao.

DENIS KAHRIMAN – predstavnik Uprave za šumarstvo

U Informaciji za OV-e, navedeno je iz razloga što su Ugovori sklopljeni kasno, znači u mjesecu novembru, dogovor je da do 30.06. tekuće ove godine, Sarajevo-šume odrade sve te projekte iz namjenskih sredstava Budžeta Kantona Sarajevo iz prošle godine. To su svi šumsko-uzgojni radovi i sanacija, rekonstrukcija tih puteva. Što se tiče projekata za ovu godinu, Uprava za šumarstvo je prošle sedmice dobila radnu verziju prijedloga Sarajevo-šuma za ovu tekuću godinu iz namjenskih sredstava da se finansiraju ti projekti. Ja ne znam da li je to u saradnji sa lokalnim zajednicama, općinama, ima tu i rekonstrukcije puteva, sanacije i slično. Da li će to općine naknadno dostaviti, da se sve to ukomponuje, ja ne znam. To je neka radna verzija za tekuću godinu. Prošla godina, kad su se sklopili ugovori, Sarajevo-šume imaju zadatak da do 30.06. tekuće godine da ispoštuju to, da bi se mogla sredstva uplatiti. Samo da se nadovežem još, kad sam u početnom izlaganju govorio, ja ni u jednom momentu nisam rekao da se radi o demobilisanim borcima koji vrše bespravnu sječu šume. Kada bi se izvršila analiza godišta lica, koja vrše bespravnu sječu šume, najviše je 1991. - 1995. godišta. Znači, djeca rođena u ratnom periodu. Ima i lica koja su profesionalna vojna lica, ja neću ovdje da spominjem imena, dođe čovjek sa smjene sedam do deset dana i ima neregistrovano motorno vozilo i odmah je u šumi. Mi pratimo njegov rad i kada se vrati sa tog svog posla, znamo da će odmah u šumu. Nažalost i toga ima. Veći dio su ljudi koji ne rade, a znači da je demobilisani borac ne, to su daleko mlađe kategorije ljudi koji se time bave. Rijetko se u našim evidencijama više mogu naći ljudi koji su stariji od 50-60 godina. Međutim, socijalni momenat je ovdje

jako ključan nažalost, da ljudi rade, mi bi sveli na neki par ljudi sa područja općine Ilijaš, te povratnike, onda bi se s njima borili. Ovo što smo mi tražili od OV-a da se uključi u ovo, mi nismo tražili da OV-e rješava problem, nego smo mislili da neka vandredna sjednica Kolegija OV-a bude, da se pozovu predstavnici MUP-a, sudstva, tužilaštva. Da se vidi zašto se daje uslov na uslov čovjeku? Zašto se ne kažnjava? Zašto se višestrukim povratnicima ne oduzimaju sredstva sa kojima vrši bespravnu sječu šume? Ako će 95% građana uplatiti drva kod Sarajevo-šuma, da bi imalo zimnicu, zašto ovih 5% ljudi da se time bavi. Ako ćemo tako, onda trebamo svi tako raditi. Bespravne sječe šuma izazivaju velike štete, jedna od tih je uništavanje lokalnih puteva, stalnim bespravnim sječama, prolaskom tih motornih vozila, traktora, ti se putevi uništavaju, tako da je tim putevima više nemoguće proći sa nekim normalnim terenskim vozilom. Ljudi posjeduju ta terenska motorna vozila, koja je platio nekih par stotina maraka, jednostavno sa dvije bespravne sječe on je to motorno vozilo otplatio. Njemu se isplati da on ide po tim takvim putevima. Osim toga bespravne sječe se vrše u vodo-zaštitnim zonama, u izvorištima lokalnog stanovništva, bespravne sječe najkvalitetnijih stabala pored puteva, ostaje neuspostavljen šumski red, prijeti zaraza šume itd. Znači višestruke su štete, prozrokovane bespravnim sječama, koje su se svele na vrlo mali broj ljudi. Iz tog razloga je napravljen dopis da se proba sa drugim institucijama uticati na te ljude, da bi se isti zaustavili u vršenju tih nelegalnih radnji.

Diskutanata po ovoj tački dnevnog reda više nije bilo, pa je Općinsko vijeće primilo k znanju

Informaciju iz oblasti šumarstva

AD-5

Informacija o ostvarivanju socijalne zaštite na području općine Ilijaš za 2019. godinu

ALMA OMEROVIĆ – predsjedavajuća

Programom rada Općinskog vijeća za 2020. godinu, uvrstili smo da nam i Informacija o ostvarivanju socijalne zaštite na području općine Ilijaš, bude sastavni dio našeg godišnjeg programa rada. Nadam se da ćemo i svih narednih godina, imati jednu kvalitetnu Informaciju.

ENISA KOVAČEVIĆ - šefica Službe socijalne zaštite Općine Ilijaš – JU Kantonalni Centar za socijalni rad

Informaciju ste svi zaprimili, ja smatram da nema potrebe da je prepričavam, ono što ste tokom čitanja zapazili, što Vam je privuklo posebnu pažnju i interesovanje, o čemu imate određenih dilema, možete mi postaviti pitanje. Informacija je sačinjena na osnovu podataka iz evidencije naše Službe, s tim što ovi brožani pokazatelji nisu ni blizu odraz nekakvog stvarnog stanja na području ove općine, imajući u vidu da se u okviru jednog evidentiranog predmeta, tretira se više različitih problema, brojevi nisu nikakav pokazatelj stvarnog stanja i oblasti, posebno kada je u pitanju općina Ilijaš, imajući u vidu nekakve geografske karakteristike i demografsku strukturu. Poslije rata došlo je do usložnjavanja problematike kojom se bavimo, posebno u nekim otežanim uslovima, koji nisu u sadašnjem vremenu ni tretirani. Kao što vidite iz Informacije, dominantna su materijalna davanja, što nije neka nova situacija u odnosu na prethodne godine, što je prije svega to odraz teške materijalne situacije u Kantonu, odnosno u okruženju, pa i na području ove lokalne zajednice, a sve zbog velikog broja porodica u kojima ni jedan član domaćinstva

nije zaposlen, zbog velikog broja porodica, gdje imamo hronično oboljelo lice, koje niti je sposobno da radi, niti je sposobno da se stara samo o sebi, pa onaj radno sposobni član domaćinstva, koji bi mogao svojim radom ostvarivati sredstva za izdržavanje porodice, mora se brinuti o takvom članu domaćinstva, što se naravno i negativno odražava na materijalnu situaciju, odnosno i materijalno stanje te porodice. Pored ovoga na području općine Ilijaš ima veliki broj staračkih domaćinstava, gdje su nažalost, najčešće u pitanju roditelji koji su pomalo zanemareni od strane svoje djece, koja su zasnivanjem svoje porodice, odvojila se fizički i pomalo zanemarili tu svoju obavezu, koja je i zakonska i moralna i običajna, tako da smo malo u tom segmentu zatajili. Poseban problem u radu, kada je u pitanju ostvarivanje prava i usluga nam predstavljaju fiktivne prijave. Vi svi znate da ogroman broj korisnika, naših usluga i prava, ostvaruju lica koja niz godina, odnosno duže žive van ove lokalne zajednice, čak žive i u nekom drugom Kantonu. Mislim da je to problem i drugih službi, ali zbog nekih pogodnosti kod ostvarivanja određenih prava i usluga, ne odjavljuju se sa područja ove lokalne zajednice i ostvaruju naša prava, kao i vjerovatno prava u drugim službama u ovoj lokalnoj zajednici, što je za nas malo problem, jer mi nemamo pravo vršiti konkretne uvide na području drugih lokalnih zajednica. Dakle, mi možemo ići na teren samo na području općine Ilijaš. Nastojim nekakvom prepiskom sa nadležnim Centrima za socijalni rad, nadležnim za općinu u kojoj žive, doći do nekih informacija, ali to u praksi nije baš nimalo jednostavno i nismo sigurni da daje pravu sliku o porodici, odnosno licu koje nam se obratilo za određeni vid pomoći. Pored ovoga, pojava nasilja je i na području općine Ilijaš u odnosu na prethodne godine u porastu. U odnosu na 2018. godinu, imamo značajano povećanje broja prijavljenih slučajeva nasilja. Svi znamo da je pojava nasilja, povezana sa konzumiranjem alkohola, narkotika, te stanja mentalnog zdravlja člana porodice, koji je najčešće nasilnik. Mogu reći nasilja je uvijek bilo, ali je došlo do osviještenosti žrtava sa kojima se i radi u tom smislu da ne trpe nasilje, da prijavljuju nadležnim službama i da se određeni oblici ili sankcionišu ili da se prema nasilnicima, koji imaju probleme na planu mentalnog zdravlja, da se upute na odgovarajuće stručne tretmane, najčešće u zdravstvene ustanove. Kada je u pitanju smještaj u Ustanove socijalne zaštite, možemo reći da je u 2019. godini, ali se to vuče iz nekog ranijeg perioda 2017. i 2018. godine, došlo do značajnog broja povećanja lica smještaja u Ustanove socijalne zaštite, posebno je zabrinjavajuće to što je došlo do povećanja broja smještaja djece. Nažalost, moram reći da je većina djece smještene u Ustanove socijalne zaštite imaju žive roditelje. Dakle, trebali bi da imaju nekakvu određenu društvenu brigu, međutim zbog različitih uzroka, roditelji najčešće zanemaruju, zapostavljaju, pa ponekad i zlostavljaju svoju djecu, što je razlog izuzimanja djece iz tih porodica. Ovdje je važno napomenuti da nakon što se djeca izuzmu iz porodica, ne dižu se ruke od porodice, nekako se nastoji da se nakon izvjesnog vremena ponovo stvore uslovi da se ta djeca vrate u svoje biološke porodice. U saradnji sa NVO, radi se na jačanju roditeljskih kapaciteta i sposobnosti i kad se steknu uslovi za povratak djece u porodice ulazi se u realizaciju. U ovom dijelu mogu reći da imamo vrlo značajnu podršku NVO. Ovdje ću posebno istaknuti NVO Hope and homes for Children, koja provodi, odnosno ona je nosilac aktivnosti projekta transformacije Dječijeg doma Bjelave, odnosno Kantonalne JU Dom za djecu bez roditeljskog staranja, koja pruža i psiho-socijalnu pomoć i podršku porodicama iz kojih su djeca izuzeta, porodice koje mi evidentiramo kao rizične u kojima bi moglo doći do razdvajanja, pa eto neko preventivno djelovanje i vezano za saradnju sa ovom organizacijom, želim istaći da mi u saradnji sa tom organizacijom, sačinjavamo individualne planove zaštite za djecu i donosimo planove, odnosno preporuke šta je za određenu djecu najbolji način zbrinjavanja. Mogu Vam reći kada je u pitanju općina Ilijaš da je za veliki broj djece preporuka izmještanje iz te ustanove kako sada funkcioniše u kolektivnom smještaju u takozvane male porodice, odnosno

porodične domove, što podrazumjeva nekakve objekte na području lokalnih zajednica iz kojih djeca dolaze, gdje bi živjela u nekakvim manjim grupama uz intenzivnu brigu i nadzor, kao i u ovim ustanovama u kojima se nalaze u kolektivnom smještaju u čemu vidimo niz nekakvih pogodnosti, prvo djeca prilikom izuzimanja ne mijenjaju sredinu, školu, društvo, pa nekako se radi na jačanju tih rodbinskih veza, kako sa roditeljima, tako i sa članovima šire porodice. Ono što je najbitnije kolektivni smještaj u ustanovama kakav je sadašnji Dom za djecu bez roditeljskog staranja, taj kolektivni način odrastanja se nije pokazao dobar za djecu. Svakako bi bilo dobro da na području ove lokalne zajednice, ako postoje uslovi za to, da se na ovom problemu poduzmu aktivnosti, što je u interesu djece koja su sa područja ove lokalne zajednice. Mogu Vam reći da mi kao Služba, pored ogromnih nastojanja i napora da ispunimo neke svoje planove i odgovorimo svim potrebama i željama, nismo u potpunosti uspjeli u tome, zbog toga što se vrlo često dešavaju u društvu neke stvari, koje nas tjeraju da iskačemo iz tih svojih planova, odnosno planiranih aktivnosti, imamo tipa poplave, puno tih nekih elementarnih nepogoda, koje u drugi plan stavljaju ono što smo mi planirali. Vezano za ovu lokalnu zajednicu, odnosno Ilijaš, smatramo da je određeni problem upućenost u prava i usluge, koja mogu ostvariti građani iz udaljenih dijelova općine, to su Nišička visoravan i cijeli gornji dio, gdje uglavnom ljudi nisu ni u nekoj značajnoj mjeri ni informisani o pravima i uslugama koje mogu ostvariti, a sa druge strane, njihov dolazak u ovaj centralni dio općine je otežan, zato što im treba novac za prevoz i još svašta nešto, oni to najčešće nemaju i zbog toga ponekad budu uskraćeni za neka prava i usluge. Sa aspekta ove lokalne zajednice, možda bi neka drugačija organizacija rada mjesnih zajednica mogla dati značajan doprinos, kad su u pitanju ti građani, jer mi imamo lokalne zajednice koji nemaju profesionalna lica zaposlena, samim tim nemaju ni evidenciju o građanima određene lokalne zajednice, o njihovom nekakvom socijalnom statusu, pa ni o njihovim nekim eventualnim potrebama u kojima bi im se mogla pružiti neka određena vrsta pomoći i određena zaštita. Pored ovoga sve NVO, čija nam je pomoć vrlo često dragocjena i neophodna građanima su izmještene van ove lokalne zajednice, sve su u Sarajevu i to je opet nekakav dodatni problem, kada je u pitanju pristup pravima i uslugama građana ove zajednice. Kada ovo govorim, mislim na Organizaciju vaša prava, Sigurnu kuću, HHCN i niz drugih organizacija koje se bave ovom problematikom, koje su nama vrlo često dragocjene, jer Vi sami znate da sistem baš ne nudi rješenja za sve situacije i da mi vrlo često zbog nekih strogih pravila, ne možemo pružiti pomoć za koju utvrdimo da bi bila adekvatna na terenu, jer nas ta pravila sputavaju. U tim situacijama nam je vrlo dragocjena, saradnja sa NVO, odnosno sektorom što ne moraju poštovati sve, što mi poštujemo, a vrlo često su im i mogućnosti iznad naših, iznad onoga što nam sistem nudi. Što se tiče djelatnosti, Vi sami znate koliko je to teška i složena problematika kojom se mi bavimo, znate koliko su nam zakoni neuređeni, nedovoljno definisani, neusklađeni jedni sa drugim, vrlo često imamo odredbe zakona, koje ne možemo u praksi ni provesti. Dakle, tu je izostala sistemska podrška. O pojedinačnim problemima sa kojima se susrećemo u radu neću ni govoriti. Kada imate dijete od 15-16 godina i imate potrebu da ga izmjestite iz porodice ili ga zbrinete, ovaj sistem ne nudi nikakvu mogućnost za smještaj tog djeteta, jer sve ustanove za smještaj primaju djecu do 12 godina i eventualno tu stariju djecu, ako su u pitanju djeca iz iste biološke porodice u kojoj ima dijete mlađe od 12 godina, pa se rješava problem u paketu. O uslovima u kojima mi radimo, neću Vam govoriti, Vi znate da mi imamo već duži niz godina problema sa radnicima, zbog ovoga memoranduma o zapošljavanju. U 2019. godini imali smo perioda, kada smo radili bez ijednog socijalnog radnika na poslu, jer ljudi koji su u stalnom radnom odnosu su bili na bolovanju. Nismo mogli, zbog memoranduma angažovati ljude koji bi radili na određeno vrijeme, pa je bio neki prekid, imali smo situaciju da u roku tri mjeseca nismo imali ni jednog socijalnog radnika.

Po isteku bolovanja kolegice koja je zaposlena na neodređeno vrijeme, imali smo samo jednog, a mogu Vam reći da imamo šest sistematizovanih radnih mjesta socijalnih radnika. Pored toga, tehnički uslovi su nam vrlo loši, radimo sa vrlo zastarjelom opremom, kad je u pitanju kancelarijska oprema i računarska oprema. Mogu Vam reći da je sada došlo do nekog napredka u tom pogledu, gdje smo imali razumijevanje i ove općine, koja je imala razumijevanja za tu situaciju, tako da smo sada računarsku opremu sveli na nivo da sada možemo podržavati sve programe u kojima radimo i koji su obavezni, na kraju krajeva. Moram još da kažem, da je za naš, generalno za uspješan rad, neophodna dobra saradnja svih službi, odnosno svih faktora uključenih, odnosno svih koji rade na nekakvoj sličnoj problematici, a za dobru saradnju naravno, neophodno je poznavanje svake službe pojedinačno o ingerencijama i granicama do koje svaka služba može ići.

ALMA OMEROVIĆ - predsjedavajuća

Samo ako Vas mogu zamoliti, da napravimo presjek nekih stvari, obzirom da imamo Zaključak da budemo što koncizniji u izlaganju, a vjerovatno će i kolege imati potrebu da diskutuju i postavljaju neka pitanja.

ALMIR ŠPIODIĆ -samostalni vijećnik

Ja se zahvaljujem na ovako iscrpnom izlaganju, nisam nimalo ponosan, što danas sjedim ovdje i čitam ovakve rezultate iz ove Informacije. Nisam ponosan što u tabeli prava, mjere i usluge socijalne zaštite, Vi ste imali kontakt i pomagali 7771 građaninu naše općine, po raznom osnovu. To je gotovo pa polovina našeg stanovništva, što znači da smo mi socijalna općina. Ove činjenice što ste iznijeli su poražavajuće za nas i ne bi se trebali smijati za ovo što Vi govorite. Ovo su naši građani, odnosno građani naše lokalne zajednice. Dok sam bio predsjednik mjesne zajednice, imali smo sastanke sa Službom socijalne zaštite, pričali smo o problemima i znam sa kojim problemima se susrećete i znam koliko nemate alat ni mehanizam da riješite te probleme, na adekvatan način. Znam, koliko se trudite da pomognete školama, koje nemaju socijalnog radnika, a koji imaju konstantno probleme i u osnovnim školama. Mislim da ovi rezultati, izraženi u tabelama 7771 građanin, koji je dobio vrstu usluge, zaštite, pravnog savjeta ili šta već, da li je se ta brojka mijenjala u proteklom periodu? Da li su bile manje ili veće? Da vidimo u kojem smjeru idemo. Da li trebamo nešto pokušati, mi kao lokalna zajednica, Službi socijalne zaštite općine Ilijaš? Znači, ako su ove brojke u proteklom periodu bile manje, onda nešto nije dobro. Nije dovoljno, da mi samo ulažemo pare u asfalte, dvorane itd, trebamo se okrenuti i direktno pomoći građanima. Ako sam dobro shvatio, da ste rekli da ova brojka nije tačna, da ima dosta ljudi koji se ne jave Centru za socijalni rad za pomoć, koji to na svoj način ili prebrode ili ne prebrode nikad, ali se ne pojave i ne zatraže pomoć, jer ne znaju da imaju to zakonsko pravo. Spomenuli ste saradnja sa mjesnim zajednicama, mi smo pokušali zaista ostvariti saradnju u periodu 2015. godine sa Centrom za socijalni rad, pa smo tražili da se izradi jedna socijalna karta na nivou svih mjesnih zajednica sa područja općine Ilijaš. Svi predsjednici mjesnih zajednica su tada bili zainteresovani za taj posao. Međutim, nismo dobili razumijevanje od naše tada službe u općini, oni su rekli, ima tamo Centar za socijalni rad, pa neka oni to rade, to nije naš posao itd. To jeste naš posao, pogotovo članova i predsjednika mjesnih zajednica, oni najbolje poznaju teren u mjesnim zajednicama i najbolje poznaju probleme građana, sa kojima se susreću, kada je u pitanju ova problematika.

ENISA KOVAČEVIĆ - šefica Službe socijalne zaštite Općine Ilijaš – JU Kantonalni Centar za socijalni rad

Što se tiče ove brojke 7771, ona je sigurno tačna i ona je uzeta iz naše evidencije, ali u ovoj brojci su sadržani i ljudi, koji su došli za neko uvjerenje. Mi vodimo tu jasnu evidenciju, pogotovo predmeta, koje protokolišemo. Mogu Vam reći da je tu to negdje, nema ni nekog značajnog povećanja, niti smanjenja u odnosu na ove prethodne godine. To je sigurno, neka objektivna cifra. Ovo su u stvari korisnici, jer mi vodimo evidenciju svih lica koja uđu u službu, ovo je brojka uzeta iz te teke, u kojoj zapisujemo imena i prezimena i u kojoj zapisujemo podatke ljudi, koji se obraćaju sa različitim zahtjevima, gdje kažem nekad je to uvjerenje, nekad je razgovor, nekad je zahtjev za neko pravo, ali sigurno je ova brojka tačna, nije izmišljena. S tim moram Vam reći, da tu ima i ponavljanja, da jedan korisnik dođe danas, pa nam dođe opet za dva dana i mi ga svaki put evidentiramo. Jedan korisnik vrlo često podnosi različite zahtjeve, za više različitih prava. Tako da ovo nije broj građana, ovo je uglavnom broj prava i usluga, koja se kod nas ostvaruju.

ALAN ŠERAK - vijećnik SDP

Imao sam priliku da sarađujem sa gospođom Enisom i ono što mogu da konstatujem, jeste da se radi o vrsnom profesionalcu. Na nekim stvarima smo skupa radili, hvala Bogu evo uspјeli smo par i riješiti, tiče se prije svega uslova, ove upravne zgrade, gdje se naša služba nalazi. Ono što smo nekada dogovarali, odnosno razgovarali, tiče se toplog obroka za stanovnike, uslovno rečeno, gornjeg dijela naše općine. Ja ću Vas zamoliti, ako imate nekakav konkretan prijedlog, kako i na koji način da mi organizujemo, dostavu te hrane, da nam ovdje predložite, pa da mi u nekom doglednom vremenu to razmatramo, kako i na koji način da riješimo.

ENISA KOVAČEVIĆ - šefica Službe socijalne zaštite Općine Ilijaš – JU Kantonalni Centar za socijalni rad

Problem je topli obrok za građane ovih udaljenih područja, kada govorim podrazumijevam Nišićku visoravan, Srednje, Čevljanoviće, uglavnom taj gornji dio, sa kojeg mi i nemamo veliki broj korisnika, ali ne zato što ljudi nemaju potrebu, ljudi itekako imaju potrebu za tim toplim obrokom, ali oni prije svega ne mogu da dođu da skupe dokumenta, trebaju i zahtjev da predaju. Drugo, oni i svaki dan trebaju da dođu u Ilijaš, da uzmu tu hranu i da se vrate svojoj kući. Koliko plate prevoz u jednom i drugom pravcu i eventualno neke druge troškove, nekako ispada da se njima baš i ne isplati, da podnose te zahtjeve. Mislim da bi dobro bilo i da je to jedino rješenje, da se obezbijedi nekakav prostor u tim gornjim dijelovima u kojima bi, određena kuhinja, kao što je iskustvo sa kuhinjom Stari Grad za općinu Hadžiće, da se dogovore da podjelu hrane, obavljaju u tim nekakvim Vašim prostorima. Tu bi samo prostor bio Vaš, a sve ostalo, organizuje kuhinja, prava se ostvaruju, preko naše službe. Dakle, ne bi bilo nikakvih dodatnih troškova, niti aktivnosti, sa ovoga nivoa, sa kojeg Vi djelujete. Mislim, da bi to zaista dobro bilo, samo da znate, s čim se mi gore susrećemo, kad idemo na teren. Vjerujte, da se nekada vratimo da kupimo ljudima, da odnesemo da imaju da jedu i da piju od svojih sredstava, jer mi kroz obavljanje ovih poslova, baš nismo ni u mogućnosti. Dakle, ono što bi Vi trebali, odnosno mogli uraditi, jeste da se obezbijedi prostor i da se uputi obavijest Ministarstvu da se sa kuhinjom organizuje, ta podjela hrane na određenom području.

ALMA OMEROVIĆ - predsjedavajuća

Zaista se zahvaljujemo na ovim prijedlozima.

Diskutanata po ovoj tački dnevnog reda više nije bilo, pa je Općinsko vijeće primilo k znanju

Informaciju o ostvarivanju socijalne zaštite na području općine Ilijaš za 2019. godinu

AD-6

Prijedlog Odluke o davanju saglasnosti na plan utroška namjenskih sredstava prikupljenih po osnovu naknade za korištenje državnih šuma

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluku o davanju saglasnosti na plan utroška namjenskih sredstava prikupljenih po osnovu naknade za korištenje državnih šuma

Pauza 11,30 h do 11,35 h.

AD-7

Nacrt Odluka o

- a) usvajanju Regulacionog plana "Lješevu-Željeznička stanica"
- b) provođenju Regulacionog plana "Lješevu-Željeznička stanica"

ALMA OMEROVIĆ - predsjedavajuća

Na stolovima ste dobili Izvještaj Komisije za statut i propise OV-a Ilijaš.

ALAN ŠERAK - vijećnik SDP

Ono što mene zanima, jeste, je li bilo potrebe, da nam ovaj obuhvat bude malo veći? Obzirom, koliko ja ovdje vidim, mi ovdje tretiramo, samo onaj obuhvat, odnosno uži dio oko željezničke stanice u Lješevu. Drugo pitanje, jeste da li postoje tehničke mogućnosti, odnosno prostorne mogućnosti, da se prezentacija Regulacionog plana održi u Lješevu?

MELIHA AVDIBEGOVIĆ - pomoćnik načelnika

Podavno smo krenuli sa ovim Planom i on je došao do nacrtu, evo čeka nekoliko godina na izradu. U izradu uključio se i predsjednik mjesne zajednice Lješevu, on je bio kod mene, sve smo mu izložili, što se tiče ovoga Plana, on je pristao na ovakvo rješenje. Kada je u pitanju obuhvat, ideja, odnosno cilj ovog Regulacionog plana, bio je da se riješi podvožnjak za prelaz. Treba da se ukinu oni prelazi koji su na putu, pješački i kolski. Također, cilj je bio i da se formira autobuska okretnica za grasove autobuse. Kada je u pitanju širi obuhvat, to bi bilo cijelo naselje. Ono je većinom izgrađeno, sad kada gledamo

desno od regionalnog puta. Znači, ono je izgrađeno i nema svrhe, možda u neka doba, da se napravi za cijelo Lješevo. Koliko je to sada potrebno, evo vidjet ćemo. Ovaj dio ispod, odnosno od regionalnog puta do željezničke pruge, mi nemamo sad nekog prostora, da se to proširi, ni lijevo, ni desno. Najširi onaj dio, što smo mislili da bude centar, odnosno da se formira jedan centar za to tretirano područje, evo Lješevo, Ljubnići i svi koji prolaze. To je ta dužina, znači u dužini od 1.600 m. Na lokalitetu formirano je ono, što smo htjeli. Autobuska okretnica, stajalo je samo iz razloga, što smo htjeli da formiramo okretnicu, da dođemo tamo na kraj Kantona, odnosno na kraj Lješeva, nismo iznašli lokaciju, ostala je ona ovdje i formirana je tako, kako sad vidite. Umjesto kolskog, formiran je pješački prolaz, jer nije bilo mogućnosti da se formira ni ovaj kolski prolaz. Za kolski saobraćaj, stanovnici tog donjeg dijela, a i gornjeg, komunicirat će preko ovog prelaza u Ljubnićima, koji je Regulacionim planom Podlugovi II predviđen. Prezentaciju ćemo svakako održati, nije uopšte problem, imamo mjesec dana roka za javnu raspravu, javni uvid. Mogu se dostavljati te primjedbe, a vidjet ćemo, imamo li tih tehničkih elemenata, da se održi prezentacija i u Lješevu. Mi ćemo, u saradnji sa predsjednikom mjesne zajednice Lješevo, vidjeti to.

Diskutanata po ovoj tački dnevnog reda nije više bilo, pa je Općinsko vijeće jednoglasno donijelo

ZAKLJUČAK

1. Usvaja se Nacrt Odluke o usvajanju Regulacionog plana "Lješevo-Željeznička stanica " i Nacrt Odluke o provođenju Regulacionog plana "Lješevo-Željeznička stanica".
2. Javni uvid na Nacrt Odluke o usvajanju Regulacionog plana "Lješevo-Željeznička stanica" i Nacrt Odluke o provođenju Regulacionog plana "Lješevo-Željeznička stanica" održat će se u periodu od 29.05.2020. do 29.06.2020. godine u kancelariji broj 20. Općina Ilijaš II sprat, a Javna rasprava na Nacrt Odluke o usvajanju Regulacionog plana "Lješevo-Željeznička stanica" i Nacrt Odluke o provođenju Regulacionog plana "Lješevo-Željeznička stanica", održati će se 03.07.2020. godine u Sali Općinskog vijeća Ilijaš sa početkom u 14:30 h.
3. Primjedbe, prijedlozi, sugestije i mišljenja svih zainteresovanih subjekata planiranja, MZ-a, potencijalnih investitora, građana, vijećnika Općinskog vijeća Ilijaš, dostavljaju se Općini Ilijaš, Službi za prostorno uređenje i zaštitu okoliša, koja organizuje i sprovodi javnu raspravu.
4. Služba za prostorno uređenje i zaštitu okoliša dužna je nakon sprovedene Javne rasprava da podnese Izvještaj Općinskom vijeću Ilijaš, o rezultatima Javne rasprave koji sadrži primjedbe, prijedloge i mišljenja kao i da obrazloži razloge zbog kojih pojedine primjedbe, prijedlozi i mišljenja nisu prihvaćeni.

AD-8

Prijedlog Programa uređenja građevinskog zemljišta za dio lokaliteta Banovac

ALAN ŠERAK - vijećnik SDP

Imam jedno pitanje? Obzirom da nemamo skicu, možete li nam ukratko, usmeno pojasniti na koji dio Banovca se odnosi? Koliko vidim, ovdje je navedeno da će doći do nove izgradnje? Gdje i na kojem lokalitetu će to doći?

MELIHA AVDIBEGOVIĆ - pomoćnik načelnika

Ja sam naknadno dala skicu, ne znam sada koliko vidite, znači ovdje su one tri nove zgrade koje su napravljene, što je Fazum gradio. Za ovaj lokalitet, ovdje je Tržni cenar, iznad Tržnog centra za ovaj lokalitet smo radili Program uređenja. Na tom lokalitetu, planirana je izgradnja, još pet novih objekata. Samo za ovaj lokalitet, radili smo Program uređenja.

ALMIR ŠPIODIĆ - samostalni vijećnik

Ja ako sam dobro shvatio, pored izgrađenih zgrada, planirana je izgradnja, još pet stambenih objekata, odnosno, zgrada, samo u tom dijelu?

MELIHA AVDIBEGOVIĆ - pomoćnik načelnika

Mi sada pravimo Program uređenja, samo za ovo i nastaviti će se izgradnja na ovom lokalitetu. Mi ispod, ovdje kod Binga, odnosno iza Binga, imamo planiranih još objekata, ali nismo uzeli sada to u ovaj Program. Kada bude to aktuelno, uraditi ćemo Program uređenja i za taj dio.

ALEN HASKOVIĆ - zamjenik predsjedavajuće

Naime, samo bi da skrenem pažnju, da mi kao lokalna zajednica u nekoj budućnosti vodimo računa o parking prostoru na tom dijelu, predjelu oko Banovca. Da idemo u tom smijeru oko izgradnje parking mjesta, prema Regulacionom planu, kako je to i predviđeno.

MELIHA AVDIBEGOVIĆ - pomoćnik načelnika

Za ove sve nove zgrade, uslovljene su sve podzemne garaže, koje mogu biti veće, nego što je sama površina zgrade. Na ovom lokalitetu, ova ovdje zgrada, ovo je planirano sve za garaže. Vodi se računa o tome.

ALAN ŠERAK - vijećnik SDP

Imate li grubu procjenu, koliko ćemo mi na osnovu renti, oprihodovati sredstava, po pitanju izgradnje i prodajom zemljišta, naravno ukoliko je naše?

MELIHA AVDIBEGOVIĆ - pomoćnik načelnika

Nisam računala zemljište, ne znam koliko je u I zoni, ali možemo odmah sračunati. Znači, mi ćemo, sem ovoga uređenja, koje je 825.000,00 KM. 872,45 KM za površinu tamo stana, odnosno poslovnog prostora, koji je na lokalitetu, površina je 1283,90 KM, što je promjenljivo, to će se tačno utvrditi projektnom dokumentacijom. Ja sam ovu površinu uzela iz Regulacionog plana. Mi ćemo vratiti ta sredstva od uređenja i za rentu koja je fiksna, sad u ovom momentu, kad je budemo računali 44,00 KM, još ćemo na tu površinu, dobiti 452.491,60 KM bez zemljišta. Kada je u pitanju zemljište, male su to površine i nisam računala. Vi ćete to svakako znati, obzirom da ćete ovdje učestvovati u tome, kad se budu dodjeljivale lokacije.

Diskutanata po ovoj tački dnevnog reda nije više bilo, pa je Općinsko vijeće jednoglasno usvojilo

Program uređenja građevinskog zemljišta za dio lokaliteta Banovac

AD-9

Prijedlog Odluke o neposrednoj pogodbi za prodaju neizgrađenog građevinskog zemljišta k.č.br. 713/5

ALMIR ŠPIODIĆ - samostalni viijećnik

Na kojoj lokaciji se nalazi predmetno zemljište, koje se prodaje?

HAMIDA MURATOVIĆ - šef Odsjeka za imovinsko-pravne poslove

Lokacija je, gdje su bile ove stare garaže i šupe, što su porušene, pa ide red, gdje su bile ove barake. Tu čovjek ima izgrađen stambeni objekat, to je jako mali prostor nekih sedamdeset i nešto m² objekat i ima 53 m² dvorišta. Ova općinska parcela je uz tu parcelu, tako da je po Regulacionom planu, to zemljište, moglo da se utvrdi kao zemljište za redovnu upotrebu za ovaj objekat. Znači, kad se sve to sabere, to nije opet, nekih ni 300 m². Inače su građevinske parcele do 500 m², unutar gradske jezgre.

Diskutanata po ovoj tački dnevnog reda nije više bilo, pa je Općinsko vijeće jednoglasno usvojilo

Odluke o neposrednoj pogodbi za prodaju neizgrađenog građevinskog zemljišta k.č.br. 713/5

Nakon što je iscrpljen dnevni red, predsjedavajuća Alma Omerović zaključila je četrdesetdrugu sjednicu OV-a Ilijaš u 12:00 h.

Zapisničar:
Admir Dervišević

PREDSJEDAVAJUĆA
OPĆINSKOG VIJEĆA ILIJAŠ

Alma Omerović, BA nov.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
certifikat:CRO20794Q

